

SEZIONE REGIONALE

I Classificata Versi liberi

Culuri de fōgu de settembre

Inte l'ardù du tramuntu
versu au paize,
pe de là de ciuènde
povi i giardin, ma
quorchedün za u cüe
i dalie e i grizantemi,
otre muèn sa dan da fò attente
versu cubediñe e butte
cun alegru ciaciarò,
cuncentrè 'nta cunuscensa
du vin cu nasce.

Intu cō
in movimentu d'unda
e veddu i mé figetti,
de cuntentéssa vestii, che
balovan 'nta cubediña piña
de rappi süguzi e prunti,
mé babbu cu torciu
u riaiva: "questa dansa a l'è
'na vigilia de miraculu,
e dopu in aregalu u vin
russu ciü du fōgu cu l'ascòde. "

Cantovan i oxelli
ai crìi cuntenti di figetti.

Mi uésse trascuri quèstu tempu, ancun...

Mariolina Battistina Biggio – Cagliari

I Classificata Versi in rima

Ma cale poesia

Ma cale poesia, ma lass'istare,
abberu bi creides? Castigados!
ma non l'idides chi versos rimados
sun solu frutos de tantu pulgare?

Sun cuntzetos connotos, abbusados
e medas chi an devid'iscartare
o atzumbados in rima trapare
chi pro irgonza si che sun cuados.

E cantos an su versu comporadu
cantende una etza serenada,
cun nom'anzenu giamend'amorada
ca in presse, non l'aian cambiadu?

O creides abberu ca est puma,
pro cantu delicada diat carignu
movende sentimentu pius dignu,
s'est de pudda in braja fuma fuma?

Ardore, vida, cun abbratz'e asu,
chilcat pro rima su menzus fiore,
ma si cun rosa non faghet tenore,
ponet bassu, fiore 'e calacasu!

E peus sos machines de s'intonu
chi limb'in limba est cun s'armonia
nende-li tue ses sa vida mia,
ma su bimboi l'atit assuconu.

Brutu vigliacu prite no mi enis,
chi ti do deo su passu torrada,
ca cando b'at de ti leare gradu
ispiconas e fruscias che a deris.

Ma cando debes fagher prijoneris
ti cuas insegus poddighe pitzinnu
fatend'a poetone grodde tzinnu
coment'e narrer sa porta m'abberis?

E cudde mann'e macu bi l'iscricat
E li regalat cunsizos in rima,
poi l'agianghet ispijad'istima

chi in tres dies s'allizat e sicut.

Ca isco ene chi veru poeta
regoglit pulgaduras e iscaltu
e impitat su basciu chin su altu
e s'arga medas bortas faghet neta.

Si b'at difficultade, pius insistit,
e minetat: "a rima bos isparo!"
Ma como chentza bruglias bos isciaro
chi su veru poeta no esistit.

Esistit chentza tempus unu mundu
a istima delicada ricamadu,
ue coro a sa mente cojuadu
fizat amore su pius fecundu.

De timanza e rosas si coronat
e in laras brotat savoridos basos,
ispalghende abbratzos chena pasos
ma poesia est cand'in sinu sonat.

Sonat cando l'ispinghen fortz'arcanas,
ponzende in sas venas un'apretu
chi ti faghet cumprender su segretu
pro intonare sas bramas mundanas

Issa ti porrit totu chin su entu
e ti mustrat su pesu e sos colores,
bujos e tristos cando b'at dolores,
lebios e friscos cando b'at cuntentu.

Ma briosa e dèchida s'impignat
cando cheren cantare sos pitzinnos;
sas pius bellas seberat pro ninnos,
chi ancora non rimadas las carignat

Antonio Altana - Buddusò

II Classificata

Gramuzande

A bortas l'apo a graza
a bolare in sa lerina 'e sa paza
puzone alipintu de lampores
ch'alluen de sa mente gurgos burgos
mustrandem'ispethatas e isterritas
sas lanas graminatas mai tessitas.
Dae ora gramuzo grae pessu
si su tempus est firmu o curret lestru
e s'inghirare eternu 'e s'universu.
Est una mente manna de abberu
su ch'at formatu sos astros in chelu
e paca cosa est s'alinare meu
si cunfrontatu a s'universu intreu.
Ma si inintro nd'at postu cust'alenu
est ca a isse assimizo, e de ischire
su sentzu costoitu in su naschire
de s'ilare e tessere in su creschere
e su tristu destinu 'e su finire,
prepotente dimando e lu pretendo
ma peri sa renduta non crumpendo.
A bellu a bellu tando su pessare
s'isperdet in sas undas de su mare
e chirco de lassare s'anatare
in abbas chi mi jocan che ustriche
masticande a sa sola e chin annozu
su pane tostu d'ischida matriche.

Gino Farris - Lodè

III Classificata

Bollu bivi

Narant chi seu maca
sceti poita ca mi fatzu
basai sa buca de sa vida
àtzia e cala
s'arrùbiu bisòngiu e disigiosa
mi lassu andai a issu.

Narant chi non andu beni
poita ca non sciu abarra frima,
ma deu bollu bivi
aguantendi dònna alenu asullu
e non bollu incungiai s'amori
chi tengu arrimau aintru
custu coru innamorau.

Pobera anima
fustigada de custa genti prena de feli e àstiu
e pòberus bosàtrus chi seis tzurpus,
ma deu, tengu ogus de pampa
candu biu su mari chi dantzat
fastiggendi su soli
accudiu de su bentu de beranu,
m'incantu castiendi unu scurigadroxu,
su ballu de is follas e de is froris,
su celu scurpiu de is steddas
poita ca tottu custu
est un' adòbiu de luxi e misteru
e colorant su coru.

Bollu gosai deustus cantus de allirghia
currendi avatu a custa vida
a fragu de soli mari e bentu
e bollu morri respirendi
e bisendi.

Angelica Piras - Cagliari